

煙霞萬古樓文集

一





集文樓古萬霞煙

(一)

撰 曇 王

故孝廉王君仲瞿奇才也。嘉慶二十一年七月。嘗偕余遊雲臺山。同客海州刺史師禹門幕中者三閱月。仲瞿之學。無所不窺。而尤工於駢體。直可壓倒齊梁。余戲題其詩文藁後云。斗牛之光。芒角四起。河海之水。縱橫萬里。似戰國策。亦韓非子。二千年來。無此才矣。或又謂仲瞿之作。真如決汝漢淮泗而注之江。合金銀銅鐵爲一鑪者也。仲瞿好游俠。兼通兵家言。善弓矢。上馬如飛。慷慨悲歌。不可一世。嘗謂余曰。吾死後必葬我於虎邱短簿祠側。乞題一碣曰。晉故散騎常侍東亭侯五十三世孫王曇之墓。其好奇如此。嗚呼惜哉。平生著作甚多。有經解三卷。史論三卷。西夏書四冊。洪範五事。官人書五類。未分卷。仿班固漢書例。居今稽古錄二十卷。讀竺貫華三十卷。繙帛集一百卷。傳家六法一卷。隨園金石考四冊。煙霞萬古樓文集四十四卷。計散體六卷。四六文六卷。本集十六卷。外集十六卷。又歸農樂傳奇九齣。玉鉤洞天傳奇四十八齣。萬花緣傳奇四十八齣。遼蕭皇后十香傳奇十二齣。魚龍變傳奇四十八齣。俱未刻。僅刻駢體文六卷。亦殘闕矣。仲瞿既沒之二十載。余始集其文而傳之。爲述大略如此。道光十有八年孟夏。句吳錢泳書。時年政八十。

煙霞萬古樓文集卷一

穀城西楚霸王墓碑

秀水王曇仲瞿氏一名良士

乾隆五十九年。觀察泰武臨兵備。督山東全省糧運。前守濟南泰安府知府。長洲宋思仁。繕畢泰山馳道。種補天門。上下長松。溝泄穀城水利。遂封樹於西楚霸王之墓。周方一畝。土階三等。屬其友人王曇爲文。惟王廡馬祥車。月矢日弓。臨汝江陽之戰。吳興廳事之中。一牛釃血。百騎騰風。王何神於蘇侯。蔣帝而不神於蕭琛。孔恭臣知王魂安卞山。死羞魯公也。王以漢五年葬穀城。魯生制服。漢王臨哭。嶽抱峯藏。汶回隧曲。談書遷筆。魯經史例。三皇五帝。楚書本紀。作者謂有大王之江東八千子弟。有孔子之廟堂車服禮器。佞臣班固。竇憲筆奴。爲葉公龍。爲史公豬。沈魂狴犴。置書蒹葭。臣知大王不愛平分之天下。而忍殺手版之腐儒哉。而竊爲大王幸。幸王不葬臺泉。雍宮祈年。冢驪麓。陰盤藍田。魚膏照尸。亡羊燒山。臣竊笑漢皇帝長陵坏土。高廟玉環。呂后淫屍。赤眉入關。而王陶人茅馬。紙衣瓦棺。斥上無將軍之金。復土無校尉之官。南山鐵固。石槨泥丸。臣竊笑漢子孫。茂陵原陵。關地及泉。園郎寢郎。邑瓦無烟。玉衣出柙。文園盜錢。作昌陵。便房方中。斷紵絮。陳漆其間。校尉摸金而入鑿。郎將發邱而破穿。而大王佳城鬱鬱。萬甕銜泥。羣

鳥耘田。壽於樸陽萬年也。嬴趙毒螫。陳田淫虐。王燒秦宮室。夷齊城郭。復春秋九世之讐。報戰國六王之惡。食敖倉。戰京索。方將斬紂而自王。何云入關而背約。宋義走卒。項氏遁將。背武信而沮援。誑高陵而賺賞。陽將楚軍。陰爲齊相。幸君之敗不忠。居軍之右不讓。搏牛破虱之談。驕一軍而跋扈。猛虎貪狼之令。殺諸將如反掌。王不斬莊賈。難爲稯直。不戮揚干。誰爲魏絳。收奴孫心。芻狗兒戲。義非孤注。名類奕棋。如陳涉之號。扶蘇原非太子。或陽虎之竊。狀貌聊借蒙魁。楚方借面而弔喪。心乃尸居而餘氣。飾箏琶之爪者。義甲髡禿婦之髮者。義髻擁之則爲懷王。去之則爲義帝。曰取則取。曰廢則廢。大王方端冕以禮犧雞。祝宗以拜牢饗。而敢肩尻乎雕俎之上。縞素乎三軍之士者。漢王之詐也。榮仇不封。餘去無功。王諸將善地。則忠。王故王醜地。則公。漢方佩我關中之印。而奸我三秦之盟。樓煩則噴。楊喜則驚。質淫雉於軍中。不御。置太公於高俎。不烹。鴻門不殺。鴻溝不爭。而漢敢劫兵以犯我彭城。漢爲魚肉。楚爲刀俎。智不關雕水流。力不伏廣武弩。虜魏王不仁。梟塞王不武。滎陽西拔。靈壁東破。怯則銷六國印。懼則說九江布。張良如廁。始爲逃人。紀信乘車。終爲降虜。漢之十罪。臣不屑數也。爲天子不忠。報漢以栢羹分之太公。爲天子不仁。報漢以嫗骨醉之戚夫人。爲天子無禮。報漢以不類如意之惠帝。爲天子無義。報漢以慙不可言之審食其。擁帚不孝。頡羹不弟。墮二子車不慈。死一婦手不智。而大王七十戰之功。十七王之封。亘六帝四王而無窮也。宛邱太皞。濮陽高辛。黃帝橋山。唐帝穀林。九疑舜冢。苗山禹墳。湯無葬處。或曰汾陰。衡山二妃。鮒

魚九嬪。虞則烏江。王則穀城。臣謹案。殷人以柏。夏氏以松。將軍之樹。大王之風。銘曰。盤古葬魂。大王葬身。魂爲雷霆。身爲風雲。皮毛爲草木。髮髭爲星辰。頭爲東嶽。左臂爲衡。足爲西嶽。右臂爲恆。喜爲晴。怒爲陰。精髓爲玉。齒骨爲金。江河其血。地里其筋。眼爲日月。蛆蟲爲黎民。三百里海南之墓。周一畝大王之墳。

班固父子之廢項王本紀。微特王之罪人。亦孔子之罪人也。滅六國。燔六經。項不滅秦。而魯之廟堂車服禮器有存焉乎。魯諸生爲王三年服。城守不下。尊孔也。非私項王也。司馬遷以項王功高。故加於孔子世家之上。而進之三皇五帝殷周之後。固何人斯。而黜王本紀。宜其狴犴瘐死。而王之神靈。亦於是乎暗啞咤叱。三百年於吳興之堂矣。漢章帝以班固爲葉公龍。鄭漁仲以固之比遷。如龍之與猪。其信然歟。是碑作於二千餘之後。蓋斷自二千餘年以來。無此手筆。東皐寶光齋

蟻磯孫夫人廟碑

蟻磯有廟。俗相傳爲吳大帝妹孫夫人。殉蜀主白帝崩聞。以黃武三年薨於此。吳書簡略。夫人與全公主大小虎無傳。失春秋內女致聘歸寧卒。媵之例。案蜀志。進妹固好。不紀年月。大致在建安十三年十二月。赤壁破魏。蜀主牧荊州之十四年。春婚於京也。吳后傳。先主旣得益州。而孫夫人還吳。亦不明敘。所以還吳之故。則法正已進瑁妻吳氏於宮。舟船之迎。夫人見幾作也。是歲爲二十年。權襲取長沙三郡分界連。

和之日。可想見蜀主與夫人簋豆同牢。七年主祭矣。陳壽所以有綱繆恩紀之筆也。廟無石。吳不知夫人之德。史無文。蜀不知夫人之仁。於是懲裴松之失。以補史官曰。

某聞殺龍蛇以祀川岳者。句踐之獻美人也。遇嫫娥以筮有黃者。成湯之嫁帝妹也。權之壻備。譬非塞庫。必無瞋目喉宜生之謀。事類師昏。亦斷不作反斗擊代王之計。大意謂吳蜀不爲一家。則一鼎三足不立。東西不主二帝。則一槽三馬難平。周郎之意。以爲婚姻者。春秋之王道也。縱橫者。戰國之長城也。橋公二女。皆嫁英雄。破虜四男。尙無佳壻。孫夫人之侍婢弓刀。亦猶甄夫人之借兄筆硯也。何也。破虜天下豪也。夫人將門子也。親見皇甫夫人以文武忠臣之妻。死刀圍而罵董卓。蔡文姬以徒行乞命之身。跌蓬首而拜曹公。生女如鼠。強臣若虎。峴山之父仇未報。小女不敢反龐娥之兵。許貢之兄讎未洩。女弟不能釋姊嫠之仗。此所以逐馬囊囊。翔鷗鵬鏑。大眼戎粧。小妹雍容。追隨於獬虎家兄之馬後。而史以爲驕豪多將。吳吏兵者過也。女子母教也。吳夫人助桓王軍國。疇不知訓井家風。大皇帝愛趙母文才。況又有宮中師傅。是蜀中三尺童子。皆知夫人文武兼資。禮義足智矣。而法正佞人也。賊舊君以賣國。譙新主以瀆倫。瑁妻吳漢中王之宗婦人也。時也。關嚴道銅梁。祭武擔石鏡。夫人方將媾補漢天。夔鳴炎鼓。張錦繖以定羌涼。持赤節以平懿丕。而王已隗囂天水。子陽白帝。坐大之勢未安。楠木之心遂蕩。伯明就后羿之室。闔廬居子建之宮。謂鄭多父貪鄩國夫人。利其土地。則吳非小君。謂晉文公暱子圉懷嬴。感其沃盥。則吳豈秦

援。妲己以賜周公。曹操之所不收。寡婦何知社稷。孫后以爲可笑。此習鑿齒所謂匹夫猶惡無禮。惡法正。惡漢王也。夫人剛猛人也。無鹽薦枕。不取娛於好色之齊王。嫫母清宮。徒見忌於無情之黃帝。勢將醉飾。唐姬則烈女不能事亡國婦人。將糜爛望卿。則高明又必失中宮大度。與其椒房散號。口戰銀刀。左右英娥。心寒粉陣。使漢中王束帶自稱下官。耳順強呼娘子。芒刺在背。交戟入頸。以魚水夫妻爲戎狄。以酣睡臥榻爲他人。外揚高帝。韓薄不脩之名。內彰孝文。衽席無辨之醜。穆姜且豫卜東宮。雲臺亦自疑霧露。咸猶呂鼠。勝負未可知也。呼阿斗而告曰。深山大澤。余恐生龍蛇。以禍汝也。善事漢王。不暇刺促顧婢子語矣。於斯時也。腸繞吳門。魂啼蜀鳥。夫人行矣。某獨笑趙子龍宮官也。左轂鳴。則雍門狄爲之請死矣。樓船御。則薛廣德爲之頸血矣。雲無張良。能羽翼太子之功。而有蘧越。實亡君夫人之罪。牽孺子爲牛之小恩。而率興愛子投車之大衆。扈當陽坂。一抱零丁之弱子。而凌犯長秋宮。七年大歸之小君。且以此舉截江留斗。爲大有名之師。足摠發吳人一笑也。雲試思。憤夫人走邯鄲之道。袁盎如何卻退。晉穆羸抱太子而啼。趙盾可曾豪奪。借使夫人繡旗一怒。武帳珠襦。鼙鼓三中。水軍將令。呼孟勞而侍女刀光。叫餘皇而長纓。滯棹。則其時。鱗鱗藏兵。白衣而呼警者。呂蒙也。鱗衝脫纜。暴風而二拒者。董襲也。招以北風。丁奉之帆。登岸皆升城之督。麾以舵樓。谷利之令。上山皆白棒之兵。而夫人敬以鼓角勞軍。旂門受詔。蹕前周泰。纓蓋先鋒。馬後虞翻。持矛步從。雲能以一身之膽。納百婢之刀乎。吾恐張飛僅能瞋目橫矛。以決死據長坂。

橋不能牽人斫頭以沙囊斷長江流也。蓋其時權且大遣舟船迎妹。而夫人慟哭也。知夫人必以太子歸。

吳何也。魏略禪以建安十六年身賣漢中。父事劉括。

禪年數歲。置。隨人西入漢中。爲人所賣。及建安十六年關中破亂。扶風人劉括。避亂入漢中。買得禪。問知其良家子。

遂養爲子。與娶婦。生一子。初禪與父相失時。識其父字元德。比舍人有姓簡者。及備得益州。而簡爲將軍。備遣簡到漢中。舍都邸。禪乃詣簡。簡相檢。訊事皆符驗。簡喜以語張魯。魯乃洗浴送詣益州。備乃立爲太子。據魏略以爲建

安十六年事。則在十三年趙雲抱太子之後。

使其時杵嬰不識趙孤。書退勿呼父字。則十三年趙雲長坂之功。又委棄字於牛羊。

乳鬪文於邱虎矣。幸而方望真人能留孺子。華陽奇貨得歸異人。夫人念嬰覲於伊水。此兒久付空桑。失

抱帝之膝公。諸將誰爲擁樹。寧使漢家有烹羹置組之太公。不可使劉氏有白板青衣之太子。與其吳鴻

扈稽呼著父胸。孰若石紐塗山藏諸母腹。與其趙嬈胡組。誤二漢之保阿。孰若遯抗機雲親三吳之師傅。

在英雄不顧妻孥。龍種豈無媼母。況孔甲有此乳兒。阿蘇何非己子。其挾以歸也。留震宮長子東方。免秦

宓天頭西顧。秦康公之爲晉甥。非長安君之爲趙質也。而况阿斗者。甘后之玉人。又二兄之鼻涕。聖公升

殿俯首羞慚。盆子探符。汗衣欲哭。夫人憫齊歸早死。雖然稠有童心。望周子迎京。或者悼能霸晉。且后緒

自計歸仍子疆。不曾廢母。則安知不六后臨朝。身猶故劍。四帝外立。留此前星。已不沙婆豕牢。人免薰君

丹穴。此夫人嗽乳捫天。推乾就溼也。乃漢王始以孟子諱吳。終以向姜絕莒。不留堯母之門。忽絕鄧甥之

好。謂娶妻必得陰麗華乎。則惟斯人乃有斯婦。謂生子當如孫仲謀乎。則無此舅焉有此甥。而蜀之人。乃

以爲趙王歸漢。如意之酒必酖。燕丹機橋。太子之烏必白。則孫夫人非呂太后。吳大帝豈秦始皇耶。曰。使

趙雲勒兵斷江。魏晉春秋之言。佞臣法正之謀也。曰。與張飛勒兵截江。趙雲別傳之言。非丞相諸葛之策也。時正爲軍謀主。亮所謂正能制主上。亮不能制法正。故曰非亮罪也。太公之法曰。一女子當百丈夫。又曰。理四海如妻子。故孟津用婦人與周。孫武戰宮人勝楚。由余未霸。小戎以女子談兵。蚩尤不禽。元女以南車教戰。世能祖祖。鮮能將將也。而况吳多謀士。蜀無將才。使夫人以定姜卜戰之龜。灼銅雀金臺之兆。以馮嫪詔使之節。渚分香寶履之宮。將見西揖闕氏。魂褻冒頓。北呼公主。馬抱烏孫。割長江而讀甥舅聯盟之碑。開玉門以鑄外孫單于之印。許馬懿巾幗來朝。使甄后掖庭贊拜。而後東封呂範之妻。歸拜張昭之母。江東衣錦。炎漢重興也。而乃鼎未三分。商亡一物。夫人遜國。淫后如宮。使虎威南郡。忿興拜賜之師。伯言夷陵。怒報泛舟之役。而猶謂楚文荆尸。勿因息媯。齊桓伐楚。不爲蔡姬。吾不信也。向使夫人身不歸吳。計能鎮蜀。則長沙零桂。焉知不三索來歸。雲長益陽。又何必單刀去會。罷巫峽七百里之屯。唾虢亭四十營之火。全琮陸遜。安敢輕佻。黃蓋韓當。豈能平視。箠使吳兵。鞭敲蜀將。又何必西增白帝之兵。東益巴邱之戍哉。亮書曰。主上之在公安也。外慮曹操孫權之逼。內懼夫人肘腋之憂。曰在公安者。言初婚至京。一卮鬻酒之夫人。非于飛入蜀七年牀第之夫人也。某聞春秋之義。忿不廢親。怨不滅德。穢陵尙報秦施。城濮不忘楚惠。蜀主乃不念敗亡。樊口棄其室家。奔問柴桑。未諧昏媾。吾江東先之魯肅。但有蒼梧遁跡之言。詢之孔明。惟有披髮山林之請。而其時甘皇思血飛小沛。有狐誰綏。曹丞相筆落許都。荊州誰借。設

孫將軍或有趙襄夏屋之忌。孫夫人不守季平一負之仁。借弟姊以廢笄。中鑿壺於智伯。則吾江東帳構之銅。皆專諸之鉞也。夫英雄之見。助夫不非慶女。殺夫亦是雍妻。而卒使齊姜返國。無煩蠶妾之謀。嫖妹于歸。不浴龍工之藥。則可知西施越絕。斷無種蠡陰謀。昭君和親。不是漢宮祕計矣。乃蜀主恩忘齊大。陰輕子忽之援。義蔑秦嬴。伴忍先軫之唾。此吳國君臣。事以盤郢之劍。送死女。不以女滕之口。食殘魚也。夫人蓋以有生日爲未亡人矣。讀魯史。孔子以彭城予宋。非予宋也。通吳援也。虎牢予鄭。非予鄭也。脩楚戰也。吳無荊州。而巫峽之援不通。吳無荊州。而濡須之隔難戰。是吳以一女初婚。失三江大局矣。吳爲索地。蜀實負人。魯橫江所謂凡夫不忍行。而况整頓人物之主者。非怨語也。洎乎臨沮敗好。盪寇歸元。白帝脩盟。張溫報聘。安知非哀姜哭市。內推敦后之環。綠衣拜勤。外解宋王之閉。而能敦舊乎。夫自古處女爭桑。尙開邊釁。焉有呂姜斷髮。不啓鄰仇。在夫人埋璧情深。履薪怨小。謀桑不霸。就木徒甘。輟聲已帷堂。不視之哭。應意其畫紙埋人之識。漸臺水沒。萬里江長。杞國城崩。千年蜀破。娥皇無子。堯母無夫。伊可慟也。嗚呼。白狐九尾。開山啓母之魂。暴雨飄風。杜宇鵲禽之血。讀華嚴宮門發表。吳太情深。惡法正盜國奸宗。蜀無人理。某竊笑君王巾幘。女子英雄。手陳承祚殘書兩冊。牝后有名。悲裴松之補注千條。夫人無傳。此天難補。斷女媧神化之腸。是文若傳。掛吳國宮門之眼。銘曰。

雌鳳不隨。雌龍不飛。三分鼎足。一篋當歸。于歸不戀京。大歸不出惡聲。國君外淫。夫人不爭。公安無家。夫

人則守益州有家。夫人則走爭國世子。劫君王后。子龍之膽敢如斗。樊口來婚。喪家之狗。三年不言。三年不笑。繞吳門者腸。倚大井者教。戴冠佩劍。夫人之孝。以智事備。則隨。以禮事備。則歸。以仁事備。子其子。以義事備。死則死。蟲八蜀腹。橫目苟身。薰蕕不同器。以劉琨妻爲夫人。勇而禮不亂。仁而禮能斷。亡乎亡乎。有夫人之德而不能興漢。婦人有集英雄有記。吳書寥寥蜀書廢。桓桓夫人。弓刀侍婢。

鄰水縣先賢子路顯神碑

梓潼不神。夔子無靈。於是蜀賊徐添德者。紅巾鼓亂。綠林弄兵。脅達州九姓之衆。攻鄰水斗大之城。田單守卽墨。而天神下降。法和軍江陵。而羣神隨行。長圍於丙辰。垂破於庚申。羌蠻三兔之窟合。秦楚一蛇之勢成。豈特人肝切膽。柳下跖之大盜。城頭子路。刁子都而同名哉。守鄰水將宰鄰水令。勇則樓煩入壁。怯則陳餘棄印。城上尸膊。地中角鳴。叢祠狐鳴而呼火。毛人泣城而見精。於是讀孝經則漢朝皆笑。拜韓信則一軍皆驚。如我友甘補堂孝廉冕。以遠徒七十。當瞎巴三千。旂旗之續蟠於地。鐘鼓之音震於天。宣父圍匡之日。仲由氏結纓之年也。時冕以鄉兵萬餘人繼絕。冕繼於菴谷。懸絕。得賊糧。鄉兵復振。冕以義從五萬人。保西鄉八九路。百戰艱危。五年暴露。人謂曲阜有曾參。則鷗梟不入城郭。宋君用墨子。則輸盤撤其攻具。冕勝則爲子思守。敗不爲武城去。使徐賊負偃王筋骨而來爭。聽與霸鈴聲而不懼。非勇也。不知鳥窮則啄。獸窮則攫。顏子仁人之言也。時有官區民變之謠。見邱抄。白羽若月。赤羽若日。季路有勇之氣也。昔李靖告華山。而呼僕射。蕭遼顧瞿唐。

而見白帝。心之感則思禽之制在死。四墉鄭祈。三塗晉祭。蓐收虎爪夢其威。刑天干戚誅其厲。我先賢示夢於鄰水校官也。命以黑旗書子路之神。白堊寫至聖先師之位。當四門插當火器跪如靈姑旌如桑林。旆賊之礮。修聲箝賊之圍。魚鱗潰者何也。冕抑知寶雞黃蛇之時。崇丕聆隨之神。天淵玉女。礪館神君。巫咸神大而詛楚。杜主鬼小而霸秦。而况石盤虎尾。由也雷精。雞冠猥佩。尼山素臣。乃狐黯畏子路之目。而堂衣犯孔子之門。城破則桓魋樹拔。賊入則金絲堂焚。使其開吾戶。據吾牀。飲吾酒。此城勿守。孰若料虎頭。編虎鬚。免虎口。此距可走。先賢所爲蒲弓木戟。子路遺孤仲子逞。以蒲弓木戟報狐黯殺父仇。見孝子傳。蠶耀蛟奮。仇敵在前。乳虎在後也。某聞天之所輔者德。神之所佑者國。狀成湯伊尹之夢。則晏嬰不伐宋師。廢祝融鬻熊之祀。則夔人終爲楚滅。祿山大盜居軋犖而爲鬪神。周公神兵助隋朝而戰李密。霍神以白衣助唐王。唆以陰兵討賊。卞山救臨汝。項王之土偶如風。大眼寇鍾離。蔣帝之馬蹄盡溼。何必祭子胥以牛酒。祀之推以寒食。元謨救命。空誦觀音之咒。敬則還神。徒殺十牛之劫哉。案唐咸通五年。有黔軍校居宣父廟。每食則薦。每夢則教。見王者衣冠曰。吾孔仲尼也。汝當以更名顯。以殺賊效。以司農卿晉汝之官。以饗宗儒易汝之號。其後蠻寇滅。孔子笑。今冕之戰多甚於彼。而冕之署功辭其報者又何也。冕之言曰。戰五年而滅賊非勇。殺萬人而受賞非仁。方冕受圍於鄰水也。守無韋叡。戰無張巡。婦人則琅邪呂姥。王靈仙。苗姥也。時起於南龍。女子則陸州碩真。齊王氏。養女也。以白衣起於襄陽。欲與徐賊合。子不聞順者或亡。逆者或存。盧循禱戰。助水者南康之廟。爾朱入洛。縮波者

灋津之神降靈則有摩醯。出盪則有子文。倘鄴下神兵不破朱榮之膽。城隍風浪反助慕容之事。則冕方且之反之策殿焉。焉能有若之保稷門。人見僕射陂邊有無數小旗之李衛國。冕不望臨海廟裏有一州相報之陰子春也。幸而鬼叫狼啼。乘茅將軍出獵之勢。鳴鑼響角。藉夏后子赤城之靈。使徐賊五斗道窮。債其鬼卒。八公山木。見此人形。不然則豕狗入曾參之室。河伯陷澹臺之城。冕亦將覆醢而待死。斷纓而無生。天不絕五殘六賊。昭明咸漢之妖。國不宜養黎軒幻人。木熙假子之兵。墨吏搆虔而虎冠。兵官干擻而膽青。險不使俎豆疊宮之司寇。脫冕微行而出走。燔臺率爾之仲由。三都一怒而墮郈。我爲子說。子爲我銘。銘曰。

隣水之圍。掘鼠煮弩。有睢陽危。無玉壁固。冕也。斷顏回之劍。絕曾參之火。如子路氏拜拯溺牛。暴馮河虎。制虎者頭。扼虎者喉。戎山顯神。至於韞邱。時惟仲由使有若三百人之中。樊遲踰溝。冉求用矛。勝兵八百。養徒三千。縞衣白冠。端木氏陳說其閒。如甘興霸。如魯仲連。贈顏回少師。贈曾參少保。子路行行。司空一蠹。何居乎宓子賤之一琴。冕抱之而終老。

漢高安侯董賢廟碑

讀漢書至董偃令終。鄧通強死。未嘗不廢書歎也。醋離小忌。乃積怒於青宮。含桃餘甘。不操刀於太子者。豈無術哉。予登華山。遍遊秦中。求唐陵碑版。至杜鄠。見有漢高安侯董賢廟焉。塤垣聿興。榱桷旃飾。曰異。

哉。此道州有鼻之祠。常山董卓之廟乎。曹操廟於夷陵。而申屠撤之。王敦像於武昌。而溫嶠去之。此無怪秦檜之血食於溫。吳元濟之俎豆於蔡也。遂下馬。見堂廡樹碑。大書以辨哀帝臥起之妄。其文甚美。因揖神而告曰。嗚乎聖卿。君侯奚見辨之小也。君臣魚水。何鯁鯁於臥起不臥起哉。昔馬援與隗囂同臥。魯肅與孫權同榻。關張國士也。於先主同牀。衛霍大將也。而茂陵外嬖。爲大臣者。咸幸臣一星之恩。割袖藉眠之愛。內平四母之爭。外攘五侯之橫。撤簾而太后入於雲臺。徙薪而將軍止於畫室。一河帶礪。九廟磐桑。雖首枕帝膝。股加帝腹。良史美談也。而彪固不爲君侯佳傳者。以侯有大司馬之權。不早除一王莽爾。莽不奪侯之印。則新都之功不侯。莽不斲侯之棺。則丁傅之屍不斲。是君侯假司馬。而新莽眞皇帝也。侯自謂居高位。蒙盛寵。不害一士大夫。誠盛德也。然某竊爲侯罪也。侯不請斬馬尙方之劍。殺張禹。乞養牛上尊之酒。殺孔光。薙纓白冠。槃水而賜巨君。而侯公賓漸臺。漢不得厝太山之安矣。謂侯無罪。某請以有罪數侯。可乎。漢郎侍中官。皆傅粉貝帶冠鵝鸞。而侯傳漏黃門。不奢領脩裘衣小袖。不敬其罪一。延年始幸。僅給事狗監。新聲協律。而聖卿初拜。卽駟馬都尉。侍中驂乘。不讓其罪二。嵇侯以弄兒壯大。擁項而誅之。而董恭以男妾國奢。尻帶而貴之。不孝其罪三。淳于亂長定宮。不謹身與嬖外交。而昭儀入椒風舍。且旦夕與妻上下。不別其罪四。鄧氏布天下錢。死不着身一簪。而縣官沒董氏財。賣且四十億萬。不忠其罪五。韓嫣徒以先趨副車。江都王驚爲天子。而高安乃以後穿登天。麒麟殿傳爲堯舜。不道其罪六。富平儀比

將軍。不過走馬鬪雞長楊五柞。而高安食邑千戶。遂致五殿六門連臺北闕。不制其罪七。寵已在丁傳之右。而代明位爲大司馬。事已誤東平之獄。而借雲禍爲高安侯。不次其罪八。識溫室省中之樹。丞相拜於車前。欺匈奴孤憤之君。單于拜於殿上。不恥其罪九。至於便房題漆。塋塚僭於義陵。玉柙珠襦。禁兵索於武庫。不反地上反地下也。其罪十。如是諸罪。爲君侯口實也。雖然。某數侯之善。昔衛青不舉士。而君侯實薦何武。石顯害名賢。而君侯不讐師丹。王嘉嘔血。侯無必殺望之之心。鄭崇上書。侯亦無沈廢更生之意。大行在殯。張放之淚不乾。山陵未成。向魃之目盡腫。王莽神姦。而僅責尙方醫藥之弗親。東廂喪事之不治。則可知藉閔婉媚。別無材能。安陵薨身。但知螻蟻。侯之無罪。萬歲千秋也。夫鳳凰負義。則反苻帝於阿房矣。艾豎忘恩。則逐靈公於死鳥矣。使侯當日者。承執中受命之詔。不屑共鯀。居然羿。寡釋子貢婦人之衣。戚妹喜丈夫之志。以雌風而竟薰重華之宮。以男子而竟作女媧之帝。借炎漢之金椎。碎亡新之威斗。銅山久已自鑄。黃袍早可加身。則斬蛇之天下。安知不爲擾龍氏之天下也。嗚呼。光武與嚴光共寢。誰見星文。鄧禹與桓帝同牀。何干天變。君臣之交。何鰓鰓於臥起不臥起哉。飛來大鳥。誰似埋屍朱翽之忠。死後前魚。宜必有驢兜崇州之廟。

附錄袁弓韜董賢廟碑原文

此碑已載華拿山制府所脩
西安府志第七十九卷

錢唐袁弓韜。以西安郡丞奉檄禱雨於終南之太乙靈湫。經杜鄠。有神祠焉。神金貂華袞。如漢上公服。

問土人曰。府君廟也。弓韜時脩太白神祠。意欲移其垣棟。是夕宿候館。夢神召見曰。余非唐崔府君。乃漢大司馬高安侯董聖卿也。哀帝末造。爲賊臣王莽所害。天帝謂予在朝。雖居高位。蒙盛寵。未嘗害一士大夫。不合羸尸埋獄。且遭發棺之慘。命予署西極郎位。專司此方雨暘。弓韜見神妍媚。因憶賢本傳。有美麗自喜之語。諦視不止。神有頰色。旋轉怒曰。汝毋爲班固所欺也。固作哀帝紀。謂帝雅不好聲色。時覽卞射武戲。卽位痿痺。末年渡劇。賢本傳中。亦有主疾無嗣之語。如此安能復幸我邪。當日君臣相得。與上同臥起。事實有之。此是漢家故事。孝武時。衛青霍去病兩大將。亦蒙此寵。可以安陵龍陽例視邪。容貌華麗。天所賦也。非貌美者必僻行。且幸臣一星。上應天象。此我二千年難明之案。子爲我昭雪之言未畢。有鬼卒二。牽一囚。聲嘶頭禿。捧一卷書至。墀下神指曰。此莽賊也。上帝以其罪惡滔天。監置寒門爲毒蛇齧。今始赦出。爲我司溷園犯小過。輒以毒草鞭鞭之。弓韜因問。囚手何書。神笑曰。此賊酷好周禮。至今抱持。每受鞭。尙以護背。弓韜就視。果周禮。猶有臣劉歆恭校字。不覺失笑而寤。次日禱畢。議新其廟。復夢神謝曰。蒙君脩廟。甚感。但思一人配食。吏朱翹者。曾爲我自劾。去大司馬府收葬我。我訴於帝。帝嘉翹義。命子浮爲光武大司馬云。弓韜歸西安。捐俸爲倡。數月廟成。旁壙朱翹像。并壙一囚。爲莽持書跪壙下。如夢見狀。署門爲漢大司馬高安侯董府君之廟。而刊之石。